

RENUNGLAH!

(Oleh Penulis Budiman)

Rabiulawal selamat berjalan
Rabiulakhir merapat pengkalan
Menurut giliran sebulan-sebulan
Perginya tak balik ayuhai taulan

Apa yang balik hanyalah nama
Genap setahun kembali menjelma
Zatnya tak dapat dipandang roma
Menurut tahunnya pergi bersama.

Tahun yang pergi tak pernah balik
Menurut bilangan terus bergolek
Bekasnya tinggal hodoh dan molek
Di situlah iktibar siasah dan tilik.

Demikian perjalanan umurnya dunia
Begitu juga umur manusia
Siapa tak ingat kurang selia
Luput masa dalam sia-sia.

Lima waktu malam dan siang
Saralah hidup kerjakan sembahyang
Dirikan agama empunya tiang
Supaya hidup tidaklah goyang

Sembahyang itu tiang agama
Roh dan jasad berkerjasama
Mengadap hadrat tuan yang azima
Mengaku hamba tidak percuma.

Berdiri teguh tunduk kepala
Berpeluk tubuh kiblat dihala
Memuji Tuhan Subhanahu wa Taala
Mohon pertolongan segala-segala.

Mohon pertunjuk jalan yang benar
Jalan nikmat terang bersinar
Bukannya jalan sesat melanar
Ataupun jalan derhaka atau honar.

Membongkok rukuk membesarkan Tuhan
Memohon rahmat dengan kasihan
Berharapkan ampun segala kesalahan
Dunia akhirat lepas kesusahan.

Sujud melekap dahi ke tanah
Merendahkan diri lemah dan punah
Kepada Tuhan berharapkan ihsanah
Dunia akhirat terlepaslah laknah.

Duduk tahiyat kaki berlipat
Naik saksi putus makrifat
MengEsakan Tuhan tidak bertempat
Membenarkan Muhammad rasulnya tepat.

Demikianlah sembahyang pun kelebihan
Caranya hamba membesarkan Tuhan
Merendahkan diri sebenar-benar kehambaan
Lemah dan daif tiap-tiap keadaan.

Tinggalkan sembahyang tidaklah harus
Dosanya lebih datang menjirus
Mengaku Islam tidaklah lurus
Hina daripada anjing yang kurus.

Anjing kurus tak gigit orang
Diharuskan tayamum air yang kurang
Menghormati minumannya pemburu yang garang
Tarak as-solat minum dilarang.

Tiap-tiap manusia ada sembahyangnya
Yahudi Nasrani sembahyang caranya
Hatta Majusi sembahyang berhalanya
Yang tidak sembahyang? Sendiri tanya!!

SIASAT

Siasat itu berkehendakkan masa.
S Susah senang akan dirasa **S**
 Sekali jangan berputus asa
Sesudahnya kelak menerima jasa.

 Yakin kepada diri sendiri.
Y Yang boleh bekerja atau mencari. **Y**
 Yafayaf di hati hendaklah digari.
 Yang kusut boleh diselongkari.

 Ingat lupa jangan bersua.
A Akan membawa pada kecewa. **A**
 Apa daku jangan mendua.
Istimewa pula bersambil lewa.

 Senang susah sentiasa dilintas
S Sopan santun penjaga batas. **S**
 Segala kekusutan jangan ditetas.
Selesaikan dia jangan dipintas.

 Tolak ansur padanya ternyata.
T Tilik selidik tutur kata. **T**
 Tunduk ke kebenaran semata-mata
Tentu dikasihi rakyat jelata.

Harun D. L. Singapura.